

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 097185 23 K
Visoko., 25.08.2023. godine

U IME FEDERACIJE BOSNE I HERCEGOVINE

Općinski sud u V.m, sudija H.H.F., uz sudjelovanje zapisničara M.M., u krivičnom predmetu protiv optuženog M. J., zbog krivičnog djela "Nasilje u porodici" iz člana 222. st. 2. Krivičnog zakona Federacije Bosne i Hercegovine, rješavajući po optužnici Kantonalnog tužilaštva-tužiteljstva Zeničko-Dobojskog kantona broj ... od 05.04.2023. godine, nakon održanog javnog i usmenog glavnog pretresa, u prisustvu Kantonalnog tužitelja M. M. i optuženog, u nastavku glavnog pretresa, dana 25.08.2023. godine, donio je i javno objavio

PRESUDU

OPTUŽENI: J.M., sin H. i majke N. rođene K., rođen 15.03.2000. godine u S., nastanjen u mjestu grad V., pismen, sa završenom osnovnom školom, bez zanimanja, nezaposlen, neoženjen, nema djece, lošeg imovnog stanja, Bošnjak, državljanin BiH, JMBG: ..., osuđivan presudom Općinskog suda u V. broj ... od 24.05.2022. godine, zbog krivičnog djela iz člana 222. stav 2. KZ F BiH na kaznu zatvora u trajanju od tri mjeseca, uvjetno jedna godina,

Kriv je

Što je: dana 06.06.2022. godine oko 19,00 sati u V. u porodičnoj kući koja se nalazi u mjestu S... u kojoj živi sa ocem H.i majkom N. i sestrom Z., vršio nasilje nad njima tako što je galamio i upućivao psovke svojoj majci N. i sestri Z. govoreći im da su kurve i druge pogrdne riječi, da bi zatim uhvatio rukama oca H. za vrat i bacio ga na sećiju, iako je bio svjestan da ovako bezobzirnim i drskim ponašanjem ugrožava mir, tjelesnu cjelovitost i psihičko zdravlje članova svoje porodice sa kojima živi u zajedničkom domaćinstvu, što je i htio,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje članova svoje porodice,

čime je počinio krivično djelo nasilje u porodici iz člana 222. stav 2. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. Krivičnog zakona Federacije Bosne i Herecegovine, i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 1 /jedne/ godine, a koja se neće izvršiti ako optuženi za vrijeme od 3 /tri/ godine, od dana pravosnažnosti presude, ne počini novo krivično djelo.

Na osnovu člana 202. stav 4. Zakona o krivičnom postupku Federacije Bosne i Hercegovine, optuženi se oslobađa plaćanja troškova krivičnog postupka i isti padaju na teret budžetskih sredstava.

Obrazloženje

Kantonalno tužilaštvo-tužiteljstvo Zeničko-Dobojskog kantona (u daljem tekstu KT ZDK) optužnicom broj...od 05.04.2023. godine optužilo je J.M.a da je počinio krivično djelo "Nasilje u porodici" iz člana 222. st. 2. Krivičnog zakona Federacije Bosne i Hercegovine (u daljem tekstu KZ FBiH).

Na glavnom pretresu dana 25.08.2023. godine, prije izvođenja dokaza, optuženi J.M. priznao je krivnju za krivično djelo "Nasilje u porodici" iz člana 222. st. 2. KZ FBiH, a njegovo priznanje je u saglasnosti sa dokazima u koje je sud izvršio uvid i to: rješenje Općinskog suda u V. broj: ... od 07.06.2022. godine, zapisnik o saslušanju svjedoka oštećenog J. H. PS V. od 06.06.2022. godine, zapisnik o saslušanju svjedoka oštećenog J. N. PS V. od 06.06.2022. godine, zapisnik o saslušanju svjedoka oštećenog J. Z. PS V. od 06.06.2022. godine, izvod iz kaznene evidencije za osumnjičenog J.M.a MUP Kantona S. Uprava policije od 12.07.2022. godine, a koji dokaz se tiče izbora vrste i visine krivičnopravne sankcije.

Odbrana nije imala dokaznih prijedloga.

Sud je priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u cijelosti potvrđeno sa iskazima saslušanih svjedoka, a koji iskazi, kao i priznanje okrivljenog su u saglasnosti sa materijalnim dokazima, naprijed navedenim, u koje je sud izvršio uvid, naročito sa zapisnicima o saslušanju svjedoka, a koji dokazi po svom vjerodostojnom značaju potvrđuju priznanje optuženog, na osnovu čega van svake sumnje proističe da je optuženi ostvario sva bitna obilježja bića krivičnog djela "Nasilje u porodici" iz člana 222. st. 2. KZ F BiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela "Nasilje u porodici" iz člana 222. st. 2. KZ F BiH.

Odlučujući o vrsti sankcije za optuženog sud je od olakšavajućih okolnosti ocijenio da je optuženi priznao izvršenje krivičnog djela u cijelosti i time doprinio rasvjetljavanju

utvrđenog činjeničnog stanja, materijalne i porodične prilike optuženog, da je nezaposlen, mlađeg životnog doba, čeka da ide na rad u H., da se kaje za to što je uradio, a od otežavajućih okolnosti na strani optuženog sud je cijenio da je osuđivan i to: presudom Općinskog suda u V. broj ... od 24.05.2022. godine, zbog krivičnog djela iz člana 222. stav 2. KZ F BiH na kaznu zatvora u trajanju od tri mjeseca, uvjetno jedna godina, te stepen društvene opasnosti koje nosi u sebi i sa sobom izvršenje krivičnog djela "Nasilje u porodici" iz člana 222. st. 2. KZ F BiH, pa je sud optuženom za navedeno krivično djelo utvrdio kaznu zatvora u trajanju od 1 /jedne/ godine, sa vremenom provjeravanja od 3 /tri/ godine, a sud cijeni da će se sa uvjetnom osudom i dužim rokom provjere, kako je to navedeno u izreci presude, ostvariti svrha kažnjavanja predviđena članom 42. KZ F BiH (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), te postići potpuna kako posebna tako i generalna prevencija.

Na osnovu člana 202. stav 4. Zakona o krivičnom postupku Federacije Bosne i Hercegovine (Službene novine FBiH broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), sud je optuženog oslobodio plaćanja troškova krivičnog postupka i isti padaju na teret sredstava suda, jer je po ocjeni suda optuženi lošeg imovnog stanja, nezaposlen, pa bi plaćanjem troškova krivičnog postupka bilo dovedeno u pitanje kako izdržavanje optuženog tako i osoba koje je dužan da izdržava.

Sudija
H.H.F.

PRAVNA POUKA:

Protiv ove presude dozvoljena je žalba Kantonalnom sudu Z. u roku od 15 dana po prijemu iste, a žalba se podnosi ovom sudu u tri primjerka.